

## Vástáduš reivii boazodoalloealáhusa guohtunroasu birra

Mun čujuhan reivii beaiváduvvon njukčamánu 20.b. 2020 maid fylkkasátnejodiheddji ja Romssa ja Finnmárkku sátnejodiheddjit leat sádden guohtunroasu birra maid boazodoalloealáhusa dál vásiha.

Nu go čállibehtet, de lea dál hui duodalaš guohtunroassu boazodoalus, lassin covid-19 njoammudávdda leavvama maid riika ferte hálddašit gáibideaddji dilis. Mun sáhtán didjiide lohpidit ahte guohtunroassu boazodoalus lea hui bajás vuoruhuvvon departemeanttas. Ieš lean hui dárkilít čuvvon guohtunroassodili boazodoalus. Mus lea earret eará leamaš njuolggá oktavuohka Finnmárkku gearggusvuodálávdegotti jodiheddjiin, ja buorre ovttasbargu boazodoalloeiseválddiiguin ja Norgga Boazosápmelaččaid Riikkaserviin (NBR). Lean maid čađahan Sámedikkiin čoahkkima gos guohtunroassu lei okta fáddá mánggá eará fáttás.

Dán jagáš boazodoallošiehtadusa šiehtadallamiin sohppojuvvui mo šiehtadallanbealit galget guohtunroasu hálddašit. Departemeanttas lea leamaš hui buorre ovttasbargu NBR:n miehtá dálvvi. Eanadoallodirektoráhta ja fylkkamánnit, vástideaddji ovttadagat, gozihit šiehtadallamiid mearrádušaid čuovvoleami.

Boazodoallošiehtadusa 2020/2021 šiehtadallamiin sohpe šiehtadallanbealit sirdit 10 miljovvna ruvnnu Boazodoalu ovdánahttiinfoanddas heahtegearggusvuodáfondii hálddašan dihte guohtunroasu mii dál lea boazodoalus. Eanaš oassi dain ruđain lea geavahuvvon oastit fuođđariid njukčamánuš.

Guohtunroassu lea ovdánan heajut guvlui dán dálvvi. Boazodoalloeiseválddiid manjimuš raporttaid mielde sáhtta guohtunroassu bistit gitta cuoŋománu/miessemánu molsašupmái.

Ráđđehus sáddii cuoŋománu 3.b. evttohusa Stuoradiggái ahte lasihit 20 milj. ruvnnu heahtegearggusvuodáfondii, veahkehan dihte boazoeaiggádiid erenoamáš váttis dilis ja láchit elliide ja boahstevaš buvttadeapmái buoret dili. Stuoradiggi meannudii evttohusa cuoŋománu 7.beaivve. (<https://stortinget.no/no/Saker-gpublikasjoner/Saker/Sak/?p=79332>). Stuoradiggi čuovvullii ráđđehusa evttohusa, ja heahtegearggusvuodáfoandda lea de lassánan 20 miljovvna ruvnnuin.

Lea stuora hástalus fievrídit fuođđariid ealuide. Fievrídeami lea váttis čađahit lassin dan ahte fievrídeapmi máksá. Ollu ealut leat guhkkín eret biilageainnuin. Šiehtadallanbeliin lei čoahkkín cuoŋománu 3.beaivve gos guohtunroassu lei fáddá. Dat čoahkkín lei dán jagáš boazodoallošiehtadallamiid čuovvoleapmi. Čoahkkimis mearridedje šiehtadallanbealit várret ruđa fievrídit fuođđariid helikopteriin Guovdageainnus ja Kárášjogas dohko gosa bohccot leat. Helikopterat fievrídišgohte fuođđariid bearjadaga. Jurdda lea ahte fievrídit sullii 250 tonna fuođđariid ovdal beassážiid.

Mu mielas lea buorre ahte boazodoalloealáhussii lea stuorra beroštupmi. Seammas háliidan geavahit vejolašvuoda bivdit din geat lehpit boazodoallosuohkanat geavahit váikkuhangaskaomiid ja reaidduid mat dis leat doarjut boazoeaiggádiid váttis dilis. Fylkkamánni lea earret eará mearridan giddet skohterláhtuid, ja beanaeaiggádiidda

veaddingeatnegasvuoda muhtun guovlluin. Bohccot sáhttet bahkket ođđa guovlluide, ja dakkár sajiide gos sii dábálaččat eai leat. Dat sáhttá mielddisbuktet váttisvuodaid ja riidduid boazoeaiggádiid ja earáid gaskii. Danne bivddán din lámčit dili nu ahte suohkanat aktiivvalaččat lágidit dieđuid ja ávžžuhit olbmuid vánddardit várrugasat amas riiddut eai bohciidit. Háliidan erenoamážit deattuhit ahte das lea stuora mearkkašupmi jos suohkanat čielgasit muitalit ahte buohkat galget čuovvut bagadusaid ja njuolggadusaid maid eiseválddit dađis mearridit, veahkehan dihte boazoeaiggádiid ja bohccuid váttis dilis.

Dearvuodaiguin Olaug Vervik Bollestad